

頁 629

一、菩薩行般若，所行真實否

1、《大智度論》卷 78〈65 稱揚品〉：（大正 25，612b29-c12）

爾時，舍利弗聞上無分別相法，心大歡喜，問須菩提：「若菩薩行般若波羅蜜，為行真實法？為行無真實法？」

真實法者，審¹定、不變異，即是可取、可著；若不真實，即是虛誑妄語。

須菩提常樂行深空，心無障礙，故答：行般若者，即是行無真實。何以故？般若波羅蜜空、無定相、無分別故；乃至一切種智亦如是。

菩薩行如是般若波羅蜜時，先來生死中所習、所著虛誑有為法尚不可得，何況後來觀虛誑因緣生般若波羅蜜非所著法而可得！

是故菩薩觀一切世間不真實，亦不著是般若波羅蜜。

世諦故說真實；第一義中真實不可得，何況不真實！²

2、《大般若波羅蜜多經》卷 456〈64 堅非堅品〉（大正 7，305a6-7）：

時，舍利子問善現言：「諸菩薩摩訶薩修行般若波羅蜜多，為行堅法？為行非堅法？」

頁 631

二、諸天禮敬

《大智度論》卷 78〈65 稱揚品〉（大正 25，613b4-15）：

世尊！菩薩能如是行，一切諸天、帝釋及世界主禮菩薩」者，

⁽¹⁾ 地神、虛空中神、四天王、忉利天，帝釋為主，皆共禮是菩薩。

⁽²⁾ 「梵天王」，初禪中梵世界眾生主。

⁽³⁾ 「世界主」者，欲界餘天主。

眾生多信有此天，故須菩提說言「作禮」。何以故？是菩薩捨自樂，欲利益眾生；是三種天，但自求樂故。

佛語須菩提：「非但是三種天作禮，光音天等清淨一心諸天皆亦作禮。」

欲界諸天，著婬欲心多故，禮不足為貴；

初禪天有覺觀散亂，亦不足為妙；

¹ 審：真實。（《漢語大詞典（三）》，p.1628）

² 二諦：世諦說實，真諦非實非不實。（導師《大智度論筆記》〔E002〕p.286）

上諸天心清淨，以菩薩有大功德故作禮，爾乃為難。

頁 632

三、諸天禮敬

《大智度論》卷 79〈65 稱揚品〉(大正 25, 615a1-b3)：

一、稱歎大菩薩

(一) 總說

「若菩薩能如是行甚深般若波羅蜜，十方現在無量諸佛說法時，稱揚讚歎是名字者，如我今稱揚寶相菩薩、尸棄菩薩及阿閼佛世界中菩薩。

又如十方佛說法時，稱揚諸妙行菩薩——菩薩能如所說應諸法實相者，十方諸佛說法時，亦以是菩薩為譬喻，作是言：『某方某世界菩薩雖未作佛，能如是行甚深般若波羅蜜，功德希有故。』」

如大國王有大將，不惜身命，有方便，能破怨敵，常為國王所稱譽；菩薩亦如是，觀畢竟空，不惜我身，破煩惱賊，有方便而不作證，教化眾生，諸佛所稱譽。

諸佛雖無著心，無分別善不善法，視諸阿羅漢、外道亦無憎愛，為利益眾生故，讚歎善人，稱揚善法，毀訾不善。所以者何？欲使眾生依附好人，心隨善法，令出世間故。

(二) 別論

1、稱歎寶相菩薩、尸棄菩薩

(1) 何經說此二菩薩為佛所稱歎

問曰：何經中說二菩薩佛所讚歎？

答曰：佛經無量。佛涅槃後，諸惡邪見王出，焚燒經法，破壞塔寺，害諸沙門；五百歲後，像法不淨，諸阿羅漢、神通菩薩難可得見故，諸深經不盡在閻浮提。行者、受者少故，諸天龍神持去。³

(2) 何故唯稱歎此二菩薩

問曰：如遍吉⁴菩薩、觀世音菩薩、大力勢菩薩、文殊尸利、彌勒菩薩等何以故不讚歎，而但稱譽二菩薩？

³ 佛稱揚寶相菩薩、尸棄菩薩，龍樹未見其經。(導師《大智度論筆記》[H022]p.416)

⁴ (1)《一切經音義》卷 28：「三曼陀颯陀(曼，音未盤反；經作『慢』，誤也。颯，音盤沫反；梵語，唐云『普賢』是也)」(大正 54, 496a13)

(2) 隋·智顗《妙法蓮華經文句》卷 10：「《大論》、《觀經》同名遍吉，此經稱普賢，皆漢語。梵音邨輸颯陀，此云普賢。《悲華》云：『我誓於穢惡世界行菩薩道，使得嚴淨，我行要當勝諸菩薩。寶藏佛言：以是因緣，今改汝字名為普賢。』」(大正 34, 147c29-148a4)

(3) 參見《大智度論》卷 9 (大正 25, 127a8-9)。

答曰：

A、此二菩薩雖未得無生忍法而能似無生忍法行故

是二菩薩未得無生忍法而能似無生忍法行。必有此事，一切魔民所不能壞，是故佛歎希有。

B、悲願深切，不期疾作佛故

復次，是二菩薩清淨大願行、深大慈悲心，不期疾作佛，為度眾生故⁵——有如是等功德，故佛稱讚。

C、此二菩薩人不識，故稱揚令人知故

復次，遍吉、觀世音菩薩等功德極大，人皆知；是二菩薩，人未知，故稱揚。

2、稱歎阿閼佛世界菩薩

阿閼佛世界菩薩皆效阿閼佛，初發心來，行清淨、不雜行；生彼菩薩皆效其行，是故說「阿閼佛世界菩薩」，稱譽其德。

3、十方佛亦稱歎諸世界上妙菩薩

又如十方諸佛亦稱揚諸世界上妙菩薩，亦如釋迦文尼佛稱揚二菩薩。

二、稱歎一切菩薩

何等是？

菩薩從初發意乃至十地，佛讚歎是菩薩所為甚難，能不斷佛種。

頁 633

四、無生、空、虛誑、不實、不堅固

《大智度論》卷 79〈65 稱揚品〉(大正 25，615b16-21)：

「虛誑、不實、不堅固」者，皆是無常、苦、無我門。

「一切法空」者，即是空門。

「一切法無生」者，即是諸法實相，滅諸觀。

復次，「虛誑、不實、不堅固」，即是無作解脫門。

「一切法空」，即是空解脫門。

「一切法無生」，即是無相解脫門。

如是等三種差別。

⁵ 大悲菩薩不期疾作佛。(導師《大智度論筆記》[E023] p.321)

五、住如中即住薩婆若

《大智度論》卷 79〈65 稱揚品〉(大正 25, 615c10-18)：

一、住畢竟空名住薩婆若

須菩提問佛：「一切法空相無所得，云何菩薩住薩婆若？」

佛言：「『如』中住。」

「如」者即是「空」。

菩薩住是畢竟空中，名為「住薩婆若」。

二、除如更無餘法可得，而如亦復空

(一) 須菩提問：除「如」，無餘法可得，誰住「如」中、誰得菩提

此中須菩提問佛：「除如，更無法可得，誰住如中？」乃至「無有是處」，如經廣說。

(二) 佛明義：「如」亦復空，人、法皆不可得

佛可須菩提所語，說「『如』亦空」因緣，所謂：「是如，生、滅、住異不可得；若法無三相，即是畢竟空，云何可住？若住此中得阿耨多羅三藐三菩提而說法，無有是處！」

六、天主讚須菩提說空無礙

《大智度論》卷 79〈65 稱揚品〉(大正 25, 615c29- 616a10)：

帝釋心歡喜，作是念：「須菩提實是樂說空法；須菩提有所解說，皆說空事。雖說色等餘事，其義皆趣向空；若有難問，不能作礙，空亦空故。」

若人難空，須菩提先已破空，於有無中都無所礙；譬如仰射空中。

「虛空」即是畢竟空。

「箭」是須菩提智慧。

「所說」，如箭於空無礙，勢盡自墮，非為空盡；須菩提說法因緣，事辦故便止，非為法盡。

若有人雖有利箭，射壁不能過；人雖有利智慧，邪見著有，則礙而不能通。是故須菩提說無障無礙法。

頁 637

七、無上行

《大智度論》卷 79〈66 囑累品〉(大正 25, 619a3-9)：

問曰：華供養佛及僧，是八百比丘何以獨取供養佛？

答曰：諸天所散華，諸比丘當分所得墮衣上者，見其色香甚妙，因以發心供養於佛；白言：「我從今日，當行是無上行——所謂畢竟空、無相、無作等，為度一切眾生故，如佛所說，二乘所不及。」

頁 638

八、以三乘得解脫、得無上菩提，應了了行六度乃至一切種智

《大般若波羅蜜多經》卷 457〈65 實語品〉(大正 7, 311c13-312a7)：

慶喜！當知：若善男子、善女人等，能於如來、應、正等覺勝福田所種諸善根，雖定當得或聲聞果、或獨覺果、或如來果，而證無上正等菩提，要於般若波羅蜜多甚深義趣善達無礙，修行布施波羅蜜多乃至般若波羅蜜多，安住內空乃至無性自性空……，修行一切智、道相智、一切相智，令得圓滿。

慶喜當知！若菩薩摩訶薩能於般若波羅蜜多甚深義趣善達無礙，修行布施、淨戒、安忍、精進、靜慮、般若波羅蜜多令得圓滿，如是乃至修行一切智、道相智、一切相智令得圓滿，是菩薩摩訶薩若住聲聞或獨覺地不證無上正等菩提，無有是處。是故菩薩摩訶薩眾欲證無上正等菩提，應於般若波羅蜜多甚深義趣善達無礙，修行布施、淨戒、安忍、精進、靜慮、般若波羅蜜多令速圓滿，如是乃至修行一切智、道相智、一切相智令速圓滿。

頁 641

九、以般若相應法教菩薩勝令三千世界眾生盡得阿羅漢

《大般若波羅蜜多經》卷 458〈65 實語品〉(大正 7, 312c23-313a1)：

復次，慶喜！假使汝等為聲聞乘補特伽羅說聲聞法，由此法故三千大千世界有情一切皆證阿羅漢果，猶未為我作佛弟子所應作事。汝等若能為菩薩乘補特伽羅宣說一句甚深般若波羅蜜多相應之法，即名為我作佛弟子所應作事；我於此事深生隨喜，勝於汝等教化三千大千世界一切有情皆令證得阿羅漢果。

頁 642

十、以大慈悲讚般若

《大般若波羅蜜多經》卷 458〈65 實語品〉(大正 7, 314a15-23)：

慶喜當知！若諸菩薩摩訶薩眾及諸如來、應、正等覺住此學中，能以右手若右足

指，舉取三千大千世界，擲置他方，或還本處，其中有情不知不覺、無損無怖。所以者何？甚深般若波羅蜜多功德威力不思議故。

慶喜當知！過去未來現在諸佛及諸菩薩摩訶薩眾，學此般若波羅蜜多，於諸無為及三世法，悉皆獲得無礙智見。

頁 643

十一、能持般若陀羅尼，則能總持一切佛法

《大智度論》卷 79〈66 囑累品〉(大正 25，620b21-c1)：

「阿難！是般若波羅蜜，我處處說，是行者足。」所以者何？菩薩得是般若，能行菩薩道。

「阿難！汝得是般若波羅蜜陀羅尼故，能持一切佛所說法。」

問曰：以聞持陀羅尼力故能持，何以言「得般若故，能持一切諸佛法」？

答曰：聞持陀羅尼能持有數有量法，世間亦有，如須尸摩外道亦得聞持陀羅尼；是人雖少時得，久則忘失。

從般若得陀羅尼，廣受持諸法，終不忘失——以是為差別。

頁 644

十二、般若是行者足

《大般若波羅蜜多經》卷 458〈65 實語品〉(大正 7，314c28-315a4)：

慶喜！當知：我說如是甚深般若波羅蜜多，是能遊趣菩提道者之堅固足，亦是一切無上佛法大陀羅尼。汝等若能受持如是甚深般若波羅蜜多陀羅尼者，則為總持一切佛法，令不忘失，與諸有情盡未來際作大饒益。

十三、「般若」何以名為「陀羅尼」

《大智度論》卷 79〈66 囑累品〉(大正 25，620c1-10)：

問曰：般若便是波羅蜜，何以名為「陀羅尼」？

答曰：諸法實相是般若，能種種利益，眾生愛念故，作種種名。

如佛有十號等文字；般若波羅蜜亦如是——

- (1) 能到一切諸智慧邊，是名為「般若波羅蜜」。
- (2) 菩薩行般若作佛已，變名為「阿耨多羅三藐三菩提」。
- (3) 若在小乘心中，但名為「三十七品」、「三解脫門」。
- (4) 若人欲得聞而不忘，在是人心中名為「陀羅尼」。

是故佛說如意珠譬喻，隨前物色變為名。

十四、般若與佛無上正等菩提亦無盡

1、《大般若波羅蜜多經》卷 458〈66 無盡品〉(大正 7, 315a6-12)：

爾時，具壽善現作如是念：「如是般若波羅蜜多最為甚深，諸佛無上正等菩提亦最甚深，我當問佛二甚深義。」作是念已，即白佛言：「世尊！甚深般若波羅蜜多即佛無上正等菩提，諸佛無上正等菩提即深般若波羅蜜多，如是般若波羅蜜多及佛無上正等菩提，俱最甚深不可盡故，何緣此二說為無盡？」

2、《大智度論》卷 80〈67 無盡方便品〉：(大正 25, 622a8)

色真相⁶即是般若波羅蜜相，是故說：「色不可盡，般若波羅蜜亦不可盡。」

十五、五蘊無生無盡明

1、《大智度論疏》卷 24 (《卍新續藏》46, 913a22-24)：

色不可盡故，只以色體空故，故不可盡。色無自性，波若無自性故，所以波若得生；若使此等法各有自性者，波若則不可得生也，乃至種智亦然也。當說。

2、《大般若波羅蜜多經》卷 458〈66 無盡品〉(大正 7, 315a16-c3)：

佛言：「善現！諸菩薩摩訶薩應觀色無盡故，引發般若波羅蜜多；應觀受、想、行、識無盡故，引發般若波羅蜜多；……應觀一切智智亦無盡故，引發般若波羅蜜多。」

復次，善現！諸菩薩摩訶薩應觀色如虛空無盡故，引發般若波羅蜜多；應觀受、想、行、識如虛空無盡故，引發般若波羅蜜多；如是乃至應觀一切智智如虛空無盡故，引發般若波羅蜜多。」

十六、三種十二因緣之人

1、《大智度論》卷 80〈67 無盡方便品〉(大正 25, 622a26-c12)：

問曰：若無無明，亦無諸行等，云何說十二因緣？

答曰：說十二因緣有三種：

一者、凡夫肉眼所見，顛倒著我心，起諸煩惱、業，往來生死中。

二者、賢聖以法眼分別諸法，老、病、死，心厭，欲出世間；求老、死因緣由生故，是生由諸煩惱、業因緣。何以故？無煩惱人則不生，是故知煩惱為生因。煩惱因緣是無明；無明故，應捨而取、應取而捨。何者應捨？老、病諸苦因緣煩惱應捨，以少顛倒樂因緣故而取。持戒、禪

⁶ 色真相。(導師《大智度論筆記》[E002] p.289)

定、智慧，諸善根本，是涅槃樂因緣，是事應取而捨。是中無有知者、見者、作者。何以故？是法無定相，但從虛誑因緣相續生。行者知是虛誑不實，則不生戲論，是但滅苦故，入於涅槃，不究盡求諸苦相。

三者、諸菩薩摩訶薩，大智人利根故，但求究盡十二因緣根本相，不以憂怖自沒。求時不得定相，老法畢竟空，但從虛誑假名有。所以者何？

分別諸法相者，說老是心不相應行，是相不可得。頭白等是色相，非老相；二事不可得故，無老相。

復次，世人名老相：髮白、齒離，面皺、身曲，羸瘦、力薄，諸根闇塞，如是等名老相。但是事不然！所以者何？髮白非唯老者；又年壯而白，老年而黑者。羸瘦、皺曲亦爾。有人老而諸根明利，少而闇塞者；又服還年藥，雖老而壯。如是老無定相；無定相故，諸法和合，假名為老。又如假輪、軸、轆、輻等為車，是假名非實。

復次，有人言：說果報五眾故相，名為老。

是亦不然！所以者何？

一切有為法，念念生滅不住，若不住則無故，無故則無老。

一切有為法若有住，則無無常，若無無常即是常，若常則無老，何況非常非無常，畢竟空中而有老！

復次，諸法畢竟空中，生相不可得，何況有老！

如是等種種因緣，求老法不可得，不可得故無相，如虛空不可盡。

如老，乃至無明亦如是。

破無明，如上說。

菩薩觀諸法實相畢竟空無所有、無所得，亦不著是事故，於眾生中而生大悲：眾生愚癡故，於不實顛倒虛妄法中受諸苦惱。

初「十二因緣」，但是凡夫人故，於是中不求是非；

第二「十二因緣」，二乘人及未得無生忍法菩薩所觀；

第三「十二因緣」，從得無生忍法乃至坐道場菩薩所觀。

是故說「無明虛空不可盡，乃至憂、悲、苦、惱虛空不可盡故，菩薩行般若波羅蜜。

┌凡夫肉眼所見，起惑造業，往來生死——凡夫。

2、三種十二因緣⁷└ 賢聖法眼分別，但求滅苦，不究盡求苦相——二乘，未得法忍菩薩。

└菩薩究盡十二因緣根本相如虛空——得忍菩薩乃至坐道場。

〔先雖能觀，未能具足〕

⁷ 印順導師，《大智度論筆記》〔B031〕，p.174。

十七、離法見

《大般若波羅蜜多經》卷 458〈66 無盡品〉(大正 7, 316a25-b9):

善現！若時菩薩摩訶薩如是修行甚深般若波羅蜜多，是時菩薩摩訶薩雖行般若波羅蜜多，而不見有所行般若波羅蜜多，亦復不見有法能見所行般若波羅蜜多，亦不見有如是不見。

雖行靜慮、精進、安忍、淨戒、布施波羅蜜多，而不見有所行靜慮乃至布施波羅蜜多，亦復不見有法能見所行靜慮乃至布施波羅蜜多，亦不見有如是不見。

如是乃至雖修一切智智，而不見有所修一切智智，亦復不見有法能見所修一切智智，亦不見有如是不見，亦復不見有法能斷一切煩惱習氣相續。

善現！諸菩薩摩訶薩於一切法以無所得而為方便，應行般若波羅蜜多。